



肅松錄卷三

思陵開墓申文



順天府昌平州署吏目事省祭官趙一桂爲開壙捐
塋崇禎先帝及周皇后共歸田妃寢陵事恭炤明陵
坐當昌平州天壽山卑職於崇禎十七年正署州捕
遭際都城陷沒故主縊崩至三月廿五日奉順天府
僞官李紙票爲開壙事仰昌平州官吏卽動官銀僱
夫速開田妃壙安塋崇禎先帝及周皇后梓宮四月
初三日發引初四日下塋毋違時刻未便因故主未

及修陵故借塋田妃墓內彼時州庫如洗稟同監塋官禮部主事許作梅因塋主限迫亦再三躊躇無計可施卽同工房馮朝錦星夜徒步入京復稟本府請討銀兩明示府云此爾州事非本府事也如違安塋日期罪不輕恕卑職諄諄告稟如無明示粉骨難措隨蒙硃批着該州各舖戶捐那應用事完再議可也職卽奉批與好義之士孫繁祉白紳公同商酌郡人劉汝朴及王政行等十人共捐錢三百四十千僱夫頭楊文攬去啓閉其壙中隧道長十三丈五尺濶一

丈深三丈五尺其功甚大其限甚促極力督修四晝夜至初四日寅時始見壙宮石門用拐釘鑰匙推開頭層石門入內香殿三間陳設祭品中有石香案兩邊列五彩紬緞侍從官人生前所用器物衣服俱在大紅箱內盛貯中懸萬年燈二盞殿之東間石寢牀一座鋪設裁絨氈上疊被褥龍枕等件又開二層石門入內通長大殿九間石床長如前式高一尺五寸濶一丈田妃棺槨卽居其上初四日申時後故主靈到卽停於祭棚內陳猪羊金銀紙劄祭品同衆舉哀

祭奠下塋卑職親領夫役入壙宮內即將田妃移於石床之右次將周后安於石床之左後請崇禎先帝之棺居於正中田妃塋於無事之時棺槨俱備監壙官與卑職見故主有棺無槨遂將田妃之槨移而用之三棺之前各設香案祭品畢卑職親手將萬年燈點起隨將二座石門關閉當時掩土地平尚未立冢至初六日率捐塋鄉耆等祭奠號泣震天逾時方止卑職差人傳附近西山口三村地方撥夫百名各備歛鍬筐擔昇土築完卑職同生員孫繁祉亦捐資五

兩買磚修築週圍冢牆高五尺有奇幸蒙

清朝定鼎特遣工部復將崇禎先帝陵冢修建香殿三間羣牆一週使大明故主不致淪沒於荒郊君后升遐猶享血食於後世誠哉

皇恩浩蕩昭著 曠典三代開國不逾是也今將開壙捐塋姓名併用過各項工價使費共銀二百二十六兩伏乞查炤施行

順治十六年 月 日

思陵俘祭奏記

密雲副將張誠啓爲恢城剪賊俘祭故主傾心投順
上報 新恩事竊照闖賊逆變逼殺君后荼毒生靈
凡我同讎靡不飲恨臣於四月三十日遙聞 天兵
西指剿蕩李自成是爲舊朝雪恨又因昌平是臣久
任之地率領本部兵丁直趨城下箭射血書密約本
城文武紳衿有生員孫繁祉招集鄉勇同鄉官王廷
授舉人楊春茂監生白紳生員楊應震毛應元及鄉
民舖戶白希顏等倡義奮勇臣即於本月初一日卯

時率領叅將丁■等在外攻打內外響應從卯至午連戰數陣斬級百餘活捉一百二十名跳城死者不計其數搜奪騾馬六十餘匹隨辦祭品同紳衿於初二日卯時先赴長陵祭奠將賊首李道春周祥等四名縛副從囚僞官劉愷澤等四名獻俘崇禎先帝陵墓之側寸剛具文叩奠是役也非紳衿將士共矢同讎齊心努力何以成此殲滅之功哉謹據實奏聞乞睿鑒議叙施行本年奉旨該部查叙

禁盜毀明陵示

工部爲嚴禁盜毀明陵墳房事屯田清吏司案呈本部送准禮部清咨內開看得祭祀事屬禮部地畝事屬戶部禁約樹株事屬工部爲此上聞等因於順治十三年十月十九日題本日奉

旨交與各部嚴禁該部仍不時行察如輕視怠玩必定不饒欽此欽遵咨會到部該本部看得盜毀明陵樹木墳房屢經該道拿解到部本部隨送刑部止以犯盜賊論責放而已是以各犯肆行無忌其滿洲各

有固山牛录民俱有所管府州縣官俱係各該管官吏不行嚴禁之由也以出示之日爲始各該管人役務使嚴禁如仍前盜毀犯者該管牛录分得撥什庫及小撥什庫俱治罪如各包衣下人有犯者包衣牛录并包衣大撥什庫亦并治罪至於昌平道州等官不行嚴禁縱其盜毀者該州道等官一并叅處其各陵司香監房原爲該監司香而設今有各旗人役在彼潛居嗣後凡旗下人役在彼棲止者查出即行叅究如有奸民盜毀斫伐者即照律治罪爲此合行刊

示曉諭各固山牛录及包衣牛录并該地方官一應軍民人等一體凜遵施行

順治十三年十月 日

提督總監昌宣軍務題名碑記

天壽山爲祖宗藏弓之所自文皇帝而後陵咸在焉
其地北鄰沙漠西聯上谷爰簡內臣以擁衛而兼捍
禦蓋自大司禮德寰魏公始公總飭軍務綱舉目張
炳如也繼之者爲大司禮毓華中公才望英敏器識
深通事無微不親人雖衆必覈視垣墉御將卒稽芻
牧治器械別勤惰程殿最信賞罰美不可數署在昌
平公爲立石題名以勸來者敬共職事以衛皇靈而
威四極職在陵寢豈無助焉

肅林錄 卷三 七
崇禎十三年庚辰孟秋經筵日講韓四維撰

勅建明懷宗思陵碑記

大學士金之俊

臣嘗觀古今治亂之蹟邦國興替之由使後之人得而攷焉以爲法戒者其義莫詳於史大約國之興也創業開基之君莫不有應天順人之舉積功種德爲累葉之所憑藉其亡也必末季之主或天資刻薄殘民以逞或闇弱昏庸太阿旁落或甚而縱慾敗度滅裂綱常種種失德難以枚舉皆因自取滅亡之道即國祚之脩短不同而覆敗相尋異世一轍書曰與治同道罔不興與亂同事罔不亡非虛語也我

皇上聰明睿智典學惟勤涵泳六經之暇尤研精史書舉前代之是非往事之成敗靡不溯源窮委一一究其指歸而於明朝興亡本末更瞭如指掌於是深晰崇禎帝之所以失天下者厥咎有在非末世亡國之君可同年而語也但當時既無實錄日後慮多疑傳每厯 睿懷之憫惻於順治十四年二月內爰命工部立碑表章恭繹 天語一則曰明崇禎帝尚爲孜孜求治之主祇以任用非人致寇亂身殉社稷再則曰若不亟爲闡揚恐千載之下竟與失德亡國者同類並觀於戲 宸鑒及此不能不令人低徊歎息頌我

皇上之明並日月發幽光於幾沉德邁與王昭公評於隔代真前此紀載中未有之盛事也茲工部遵諭礪石成

皇上特命臣之俊爲文以勒之碑臣係故明纍臣矢殉溝壑幸遘 永清之會再續餘生既捧 徽綸而感涕益警 專命而徬徨以謏陋昏耄如臣何能追闡遺燉仰副

皇上表章之盛心然不敢不就見聞所及繆述其槩以竊附史官之職也按崇禎帝本以英敏之姿潛德藩邸繼膺大統當即位之始正逆黨煽亂之餘中外危疑獨能不動聲色芟夷大憝如秋風振槁因目擊人心蠱壞盡屬如醉如夢之流法紀廢弛釀成不痛不癢之習銳意更弦猛圖法祖恤民隱畏天災嘗蔬食布衣痛自貶損講幄之咨詢不輟平臺之召對屢勤一段宵旰靡寧想望太平之意誠有如

上諭所云孜孜求治者假令當日有先憂後樂之臣同心一德匡濟時艱小康猶可坐致即或中材之佐警戒綢繆尚得彌縫歲月其如怙媮積玩貪黷成風下吏之精神專用以鑽營結納大僚之好尚惟在乎位高多金以致民窮盜起然發難之初不過西陲一隅亦何難以國家全力制之而上下相蒙以賊爲諱嘯聚之勢日熾月盛攻城略邑有同破竹然後舉國張皇紛紛議選將議抽兵議加派議設總理總督重臣臨渴掘井毫無成算以言勦則挫衄屢聞以言撫則招徠無術至於驕兵悍將反借勢披猖爲護身符

來不能禦去不肯追遂蔓延流毒秦晉楚豫巴蜀暨大江以北所在騷然而朝端之上方爭洛蜀之黨日構元黃之戰厝火怡堂獨以賊遺君父憂間有一二耿介特立之士以公忠體國爲念又徃徃不安於其位一時內外文武事權在握者無一實心辦賊之人矣致令仁明銳治之主不幸而丁中葉陵替之後起弊扶衰萬難措手兼之孑然孤立於上四顧盈廷茫無可倚譬如疋羸之夫病之初中尚在膚膜腠理之間中醫猶能按脈而治及耽延日久深入膏肓雖有

盧扁救療安施豈非天之所廢莫能興之而人謀不臧適任其咎者邪考史傳所載凡末季亾國之君覆車之轍崇禎帝並無一蹈焉乃身殉宗社不引天亡之言亦綦烈矣嗟乎傷哉有君無臣禍貽邦國竟若斯哉此明代徃事之可爲痛哭流涕者也我皇上深用憫惻而欲亟爲之闡揚是卽孔子當年作春秋之心褒貶出乎至公瑕瑜毋令相掩俾天下後世讀明史者咸知崇禎帝之失天下也非失德之故總由人臣謀國不忠所致庶使後之爲人臣者悚然

所知所戒而後之爲人君者亦知慎於用人也已然則煌煌睿諭明乎制治保邦勿玩小寇而弭寇必以安民爲本安民則又以知人爲本此匪直昭一時之信史實著萬世之常經蓋永爲君若臣之寶鏡云

順治十有六年己亥春三月壬辰朔十五日丙午立

明陵記

皇清順治十六年

上時邁畿輔駐蹕軍都弔望明朝諸陵荒烟蔓艸間
牂羊躑躅也念古公卿有利於民者祀之矧一代帝
王曾蒞區宇者乎爰命大宗伯擇期太常具牢粢
醴帛自長陵而下以次展祭又

諭大司空鳩工庀材修葺廢壞置陵戶樵蘇有禁不
時遣官巡視著爲令猗歟休哉洵曠古未有之典也
一時載筆臣工自能昭垂信史傳之萬世臣聖聰等

職領斯土煌煌

聖典實獲耳日用勒貞珉俾遐邇黎獻咸得覩記云爾

明思陵記

皇清順治十六年

上時巡畿甸首歷軍都弔望明代諸陵自長陵而下展祭以徧及莊烈愍皇帝尤加厚焉念十七年憂勤宵旰卒殉社稷嗟乎圖治得亂難瞑目於九泉有君無臣留傷心於千古爰命有司備物致祭既代爲

雪耻除克已塋以天子之禮用加顯謚勒石建亭乃猶鑿輅至止惻焉悲悼所以慰英靈而彰異數者蓋亦至矣聖聰等職領茲土幸逢盛舉敬勒貞珉亦與三輔父老共誌感誦已爾若夫光昭信史垂示來茲則自有簪筆記載非臣等所能贊一辭者也

昌密兵備山西按察使戴聖聰

詩

楊士奇

初名寓以字行泰和人少師謚文貞

宣德丙午謁二陵

去年侍從謁長陵此日重來慟倍增
春柳春花渾似昔獻陵陵樹復層層

王英

時彥金谿人南禮部尚書

仁宗昭皇帝輓詞

歲晏橋山路風淒薄暮天珠襦函夜月石馬鎖寒烟
尊謚高千古陵祠享萬年遺民念恩澤猶想奏薰絃

王直

時儉泰和人吏部尚書謚文端

景陵挽歌二首

苦霧纏丹旆陰雲擁翠旗山川皆斂色草木亦含悲
雨泣千官送風號萬國隨蕭蕭笳吹發不似奏韶時
其二

靈御陪仁考仙遊侍太宗珠丘連翠殿玉匣闕玄宮
海宇攀號切天庭陟降同遙知六龍駕長度五雲中

周叙

功叙吉水人侍講

春日扈駕謁陵

御幄千旗擁屯營萬騎環祥烟隨鳳蹕瑞日映龍顏
金鼓轅門樂衣冠綵仗班嵩呼來父老聲動五雲間

有燉

周定王長子高皇帝孫謚憲王

朝謁皇陵

萬壑松風捲翠濤花間晴露滴征袍龍收夜雨歸滄
海虎帶春泥過石壕千古袞旒藏玉匣九重宮殿壓
金鰲橋陵謁罷頻回首五色氤氳王氣高

許彬

道中寧陽人南禮部侍郎

清明節同高苗二學士扈駕謁山陵次韻

寶燾留行殿肩輿到上方明樓通御氣神道仰重光
柳拂千條翠花薰百和香回鑿天已曙鼓吹入雲長
劉定之 主靜永新人侍郎

裕陵挽詞

睿皇厭代返仙宮武烈文謨有祖風享國卅年高帝
並臨朝八閩太宗同天傾玉蓋旋從北日昃金輪却
復中賜第初元臣老朽負恩未報泣遺弓

李東陽

賓之茶陵人少師謚文正

孝宗皇帝挽歌詞

聖道通三極王言似六經面開天日表書作虎龍形
杞國憂方劇華胥夢不醒萬年金匱在遺訓炳丹青

其二

極意窮幽隱虛懷仰治平近臣常造膝閣老不呼名
道合君臣義恩深父子情化機元不偶天意竟何成

其三

海宇熙平日乾坤夢幻間虹流始華渚龍卧已橋山
堯茨驚新換湘筠憶舊斑翠華天上去無路可追攀

其四

靈駕歸何處茂陵西復西日輪埋地軸雲路隔天梯
月迴鳴鑾靜山圍簇仗齊玄宮松柏裏瞻望轉淒迷

大行皇帝挽歌

北闕南都象鎬豐我皇身自際時雍祇應龍種如高
帝何止虬髯似太宗草木有情皆長養乾坤無地不
包容因思二十年前事長躡仙班侍九重

巳亥中元陪祀山陵道中奉和楊學士韻

夜深燈火下齋宮路轉西巖却向東四塞河山今古
在諸陵雲霧往來同烟叢簇簇溪藤暗秋葉蕭蕭嶺

樹紅獨愧兩都詞賦手玉堂椽筆待名公

王 鏊濟之吳縣人少傅謚文恪

恭送孝穆皇太后祔葬茂陵

露宿千官繞風悲萬木號配天同浩蕩啓聖亦劬勞
紅日低黃屋青山映白袍誰云金口遠還接茂陵高
毛 紀維之掖縣人少保謚文簡

武廟挽歌

玉輦今何處宸遊事已空淚多湘水竹悲切鼎湖弓
汗簡千年後鈞天一夢中空餘舊戎帳金甲凜霜風

顧清 士廉華亭人尚書謚文僖

冬至謁陵次三江送行韻

初陽映雪暖欲蒸千門瑞氣通諸陵朝廷報本嚴奠
掃秩禮遠自前王與秋霜春雨意慘慘奩香筐帛心
兢兢高皇統天祀萬世奮自壘畝揮戟矜兩都並建
始文祖鼎命重為諸孫凝傳聞橋山初啓邑鑿輿玉
趾幾降登小臣何幸得將事敢論暑雨仍寒冰經途
百里淨如掃輿夫踴躍誇力勝迴龍小憩纔半道瞬
息已覩洪仁燈入門弛擔隨所適東寮西館各有朋

山僧頻見頭亦白為我載演牛車乘寒光凌亂入窻
戶起視海月摩空升瑤宮銀闕自萬古雖有晦蝕無
虧增嫦娥悄立如有恨欲斬桂樹嗟誰能齋居元不
礙酬咏公詩險語何層層磨崖擬刻永昭頌挽斷千
仞寒谿藤

李夢陽 獻吉慶陽人副使

望泰陵恭賦

本朝陵墓傍居庸聞說先皇駐六龍一自玉輿回朔
漠遂令金殿鎖秋峰明禋袞職雖多預備物祠官豈

盡供報祀獨知今上切每於霜露見愁容

邊貢 廷實歷城人尚書

天壽山

石門陵旦起馳路直且長青山白雲合四顧鬱茫茫
蘋藻秀空澗黍稷亦登場哲王敦孝理陵邑事秋嘗
予本草野士謬職叅奉常敢云俎豆間亦已閱星霜
縈迴度墟曲宛轉歷巖岡蒸嵐侵我肌零露霑衣裳
霑裳詎云惜鴻私難可忘

過壽陵故址

景帝臨御時自建尋毀之

玉體今何所遺墟夕靄凝寶衣銷野燐碧瓦蔓溝藤
成戾崩年謚恭仁莖後稱千秋同一毀不獨漢唐陵

望天壽山三首

徙倚東峰下西林望鬱然幽宮深闕日玉座迴浮煙
風雨清明後乾坤正德年攀龍無處所空有淚潺湲

其二

象設徒虛備龍遊竟不還勳華留率土精爽寄空山
石錮金泉黝雲棲碧殿間寢園如種竹應有淚成斑

其三

蕭松金 卷三
窈窕山徑僻喧喧徒御歸馬逢危石住燈入古林稀
樹密全妨蓋雲寒半濕衣紅門知不遠秋角聽依微
何景明 大復信陽人副使

望泰陵恭賦

陵闕皇靈闕山河王氣遙萬年龍虎抱每夜鬼神朝
玉盃留天地金燈炤寂寥如看翠華度縹緲在春宵

送呂內翰恭謁皇陵二首

弓劍登天壽衣冠望國門碧山秋殿閣白露漢陵園
雨落千官淚雲隨六帝魂詞臣松柏賦音繞鳳凰原

其二

君向六陵間中元月正圓攀松立暮日藉雨坐秋天
殿閣西山抱關門北斗懸先皇舊侍從獨到泰陵前
劉德微上陵回有贈

仙郎昨自五陵歸駿馬朝回獨掩扉已向西山瞻帝
寢更從北極眺王畿霜鐘澗壑流清漢玉殿松杉眇
翠微先帝侍臣零落盡泰園宮草日霏霏

薛蕙

君采亳州人郎中

謁茂陵祀孝貞太后

蕭林金 卷三 三
澗壑欹金岸峰迴轉翠屏園陵何鬱鬱氣色但冥冥
天外雲長白山中草自青徘徊踐霜露愁寂仰巖扃
鄭善夫 繼之閩縣人郎中

至日陪祀長陵

長陵西接黃花鎮白雪蒼巘夜色遙陰殿衮龍猶在
目往時松柏已干霄總聞一怒風塵起想見千官遷
次朝悵極南京興廢事小山何意起漁樵

泰陵詩

千林松檜鬱相迴永夜風生瀚海哀萬國昔曾瞻氣
象五雲空復護崔嵬古來鳳鳥常難至天上龍髯定
不回苦憶焚香賜第日報恩真愧濟時才

陳

沂 魯南鄆縣人太僕

武皇上賓同百官哭臨於思善門外

帝寢重屏寂寞開鼎湖龍去可能回芙蓉內殿初成
後虎豹離宮不再來三月麻衣明曉雪萬聲號慟隱
春雷巡遊幸返蒼梧轡供奉猶存玉几哀

任

瀚 少海南克人司直

諸陵望幸

翠華巡幸寢園通甲帳旌旗御氣中
河嶽萬靈隨駐輦衣冠千仗扈行宮
詔傳梁甫親埋璧聞道潯陽自射龍
海國天吳莫愁思聖躬還似厭東封

王維禎

允寧華州人祭酒

康陵陪祀

塞上猶傳八駿名帝丘今望赤霄平
千峰雲起旌旗影萬木風多劍槩聲
玉殿香烟浮俎豆瑤墀星斗燦冠纓
雍歌聽徹人歸盡獨立春宵百感生

孝烈皇后挽歌

範內留芳訓扶天有駿功仙遊知跨鳳
聖念爲當熊玉珮虛無裏蒼雲悵望中
宜春花照眼淚灑舊時叢陳子龍曰當熊句蓋指曹妃宮婢之變

黃佐 才伯香山人少詹

恭謁康陵書感

園陵報祀開秋序驄馬追趨出帝城
四塞雲山隨遠近二儀風露自陰晴
金支掩映蛟龍色玉殿蒼涼燕雀聲
悵望軒轅弓劍在春宵霑灑不勝情

皇甫汈

子循長洲人僉事

展陵曲

展陵者歲丙申以壽陵之役巡遊昌平臣爲都水使者除道西山也當漢翁離

帝眷園寢謁欵丘陵馳道旦築行殿宵營亘帷成屋
列幔爲城般雲謝巧周日非靈乾行玉輦坤御金輿
六宮婉從萬國賓趨鸞鈴響遞環珮聲徐五臣供帳
百辟燕甫朱明司辰清和肇節艸樹蒙恩禽魚騰悅
周歷王畿軫茲民業遊覽邊關洪恩祖烈去遵鸞
歸泛龍舟山開陽翠川效安流柔情並暢睿藻揚休
枚翔第頌翊贊王猷

宗臣

子相興化人副使

上陵作

金鳧常泛海石馬欲鳴風劍珮秋霜響雲烟紫塞通
河山不改色天地自相雄羣帝俱神武園陵白露中
顧夢圭 武祥崑山人布政

謁康陵

早霧籠山暝新松匝殿稠三邊餘武烈八駿想神遊
花萼皇情遠衣冠歲事脩傷心大官酒猶得獻千秋

王廷幹

維楨涇縣人九江知府

天壽山行宮

天旆三春發離宮四月開觀河懷禹跡問野見周才
日氣生高嶼雲陰拂翠臺太平叨扈從文雅愧鄒枚
蔡汝楠 子木德清人侍郎

癸亥暮秋遣祀山陵恭覽七陵御寢

燕山昭代玉輿臨處處園林抱碧岑曲磴蒼梧萬盤
路秋天白露九重心巖開御帳重帷外地茁靈芝寢
殿陰竊愧遺臣比楨榦諸陵培植柏森森

梁有譽

公實順德人主事

秋日謁陵眺望二首

清秋霜露肅祠官帝里山川此鬱盤上谷風塵隨大
漠居庸紫翠落層巒七陵松掩金鋪暝萬壑鐘流玉
殿寒香霧濛濛候靈蹕星辰還仰太微看

其二

輦道松楸玉露晞鬼神肅穆儼旌旗鼎湖寂寂龍時
下銀海冥冥雁不飛中國地形當塞險單于秋色入
關微千年陵殿雄燕嶠九廟精靈護漢畿

吳國倫

明鄉興國人叅政

世宗皇帝輓章

只怪鈞天夢未通帝星遙夜燭冥濛金輿罷幸三芝
館玉几煖憑五柞宮遺詔普天俱朔雪望靈何日不
悲風鼎湖自有雲龍會虛使千官泣墮弓

其二

載筆曾趨供奉班江湖猶自憶龍顏宮雲不散神仙
仗禁月常飄玉女環似有飛輪馳帝座不知遺劍在
人間千門望幸渾無計却恨蓬萊使未還

黎民表

惟敬從化人參議

祇事昭陵述感

日角常瞻御榻前豈知人世有桑田金滕顧命留三
相玉輦升中已一年封似霸陵終用儉衣留軒冢合
成仙微臣握管恩偏重痛徹龍髯上九天

趙用賢

汝師常熟人侍郎

陪祀昭陵紀事有作

瑤壇晴雪淨春空劍珮聲沉苑路東霜露每勤憂聖
主貂璫無復肅齋宮通原燎火分宵白拂樹霓旌映
曉紅寂寞翠華誰望幸惟餘金粟鳥呼風

宿昭陵齋房呈溟南趙館丈

先皇原廟俯層陰肅穆祠宮奉御心月露夜零千嶂
曉風泉寒咽九龍吟空傳遺鳥留園寢猶想鳴珂直
祭林繡艸宣臺何日事侍臣惟有淚沾襟

虞淳熙 長孺錢塘人稽勲

景泰窪

合沓衆山轉鴻溝界危岡貞松心不移偃蓋覆神堂
欲脫龍爲魚千古似慨慷土木骨縱橫魂來關塞長
君王奠鼇足太史筮苞桑宗廟救淪喪朱火寒有光
迎駕誼何篤覆轍戒難忘豈無延陵心重爲亡國傷

官門一以奪羨門竟迷方碧瓦易黃屋蓬顆西山傍
杜宇啼舊堦織鳥集野棠坤維幸勿絕一窪得新藏
靈表扶九宮何必敞陰房碧血障■塵芊芊白草芳
高睇歌大招涕泗灑衣裳

神宮監

奉帚陵園洗白蘋若爲露下倍傷神秦宮耐可花前
死忍向秋風哭聖人

其二

香烟遙接白雲平原上金燈夜夜明山鬼蘿衣挽秋

駕青冥有路不教行

其三

黃花鎮外擁■兵萬馬驅來山幾層難去宮中報天子朝朝只是拜長陵

古壽宮歌

獻陵當年築壽宮君王鞭石走石工馬輿朝來暮還人往來八駿如迴風死生晝夜湏臾在霹靂一聲辭大內遺罵人疑黃帝弓自斂金衣搏大塊不將玉斧脩天門不引玉液通天源營骨鍊形水銀海至今龍螫明珠渾何當疾雷飛猛雨雨淋龍髯小臣負昔日殷勤築夜臺於今直是冲霄路便使神孫一見之削平五嶽作豐碑金輪碾碎風輪墜泉上宮中萬丈旗君不見祥子嶺西金銀闕不日靈臺穿月窟願將萬壽作堯年窮卒兩河歸白骨

郭維藩

學士

謁泰陵

上陵日將午整步入紅門玉殿春長在金燈夜不昏山行嫌石角雲臥就松根咫尺臨朝次齋明待獻尊

潘緯 仲文歙縣人中書舍人

聖駕九日天壽山登高獻三閣下

僊輿九日駐郊圻清蹕傳呼上翠微朔塞秋聲連畫
角陵園霜色襍朱旂千官馬逐層巘轉萬乘龍隨磴
道飛欲記明良遊豫盛野人終愧賦才非

于慎行 無垢東阿人閣學

甲申春月扈從車駕奉兩宮聖母閣定壽宮賜
綵花文綺等物

鑾輿三駕碧山隈墨食欣傳福兆開地擁真圖連朔
塞天畱紫蓋作軒臺兩宮共倚璇丘望萬乘親扶玉
輦陪遙見黃門傳散綵紅雲朶朶下山來

黃克晦 孔昭惠安人山人

奉和霜降祀陵

金城西北萬山頭翠積雲蒸碧水流千古幽燕開白
日九朝陵寢闕清秋星辰影動祠官入霜露寒生帝
子愁廣樂無聲班欲定似聞仙蹕出松楸

楊士奇 補

重謁二陵

君恩追憶不勝哀老淚乾枯病骨摧陵下一來腸一
斷餘生知復幾迴來

周叙補

春日扈駕謁陵

旛旛神臯迥鑿輿曉駐時天連雙鳳闕地近九龍池
日月開黃道雲霞翊畫旂澤隨陽德布春滿萬年枝

王鏊補

五月七日陪祀泰陵

星樓月殿夜沉沉燭影爐煙儼若臨北極紫微尊自

在西清黃繖夢難尋蒼梧天遠孤臣淚玉帛星馳萬

國心

是日天下王
府俱來祭

十九年中游幸絕仰思王度式如

金

石珪

邦彥藁城人少保

天壽山

銀峰翠壁峙諸孫嶽勢雄開祖宅尊關塞正當山右
臂風雷近接海西門龍過古澗多成雨虎撼長松半
出根隱隱五陵佳氣在欲攀弓劍泣深恩

徐禎卿

昌國常熟人國子監博士

長陵西望恭陵

昔送宮車出長悲西雍門今來寒食節獨望灞陵園
杳杳仙城閉萋萋封樹繁當時侍從客慟哭幾人存

應亮

昌平道中作

歲晚昌平道千官歷翠微霜封陰殿瓦雲染祀臣衣
騎火通幽谷巖鐘散御幃仙遊憶空樂杳杳六龍飛

魏允中

懋權南樂人吏部考功司

和馮負外秋日上陵

青山一望松楸地紫禁遙分劔佩行斷壑有雲猶捧
日高陵無樹不沾霜遺弓欲灑千秋淚薦食頻修八
月嘗禋祀向來多寵渥不應西署老馮唐

李

傑

世賢常熟人宗伯

奉祀天壽山

有序

五月十三日上以亢旱命臣傑祭告天壽山
之神晚至昌平雷雨忽作次日四鼓祀畢出
陵月色如晝歸至沙河回望西北諸山雲氣
靉靄流水已沒斷橋矣十六日京師雨十七

日大雨畿甸霑足賦詩志之

玄雲四合雨傾盆朝野歡騰頌至尊已藉靈祇通上帝自應列祖祐神孫禾苗漸發高低壟草樹重榮遠近村猶記昨宵祠禱罷蒲山明月照陵門

張才 茂參西安衛人僉事

朝陵歌

本朝陵墓傍燕關殿閣參差霄漢間王氣千年朝北極雄圖萬里抱西山

其二

松門回首七陵遙春殿金燈鎖寂寥地迴忽看星斗動夜深疑有鬼神朝

江暉 景孚仁和人僉事

謁康陵

五柞淹珠葆千杉闕玉襦靈山鍾自肅虛殿珮仍趨雪暗蛟龍蟄雲寒燕雀呼塵沙迷列岫何處訊蒼梧

林爓 貞恒閩縣人宗伯

孝烈皇后挽歌

鳳穴金宮秘龍章寶冊宣曾將五色石能補九重天

蕭林錄 卷三
桂殿花空落松門月自懸惟餘歌懿德長續二南篇

王世貞 元美太倉州人司寇

大行方皇后輓歌

密雨椒塗淨傷雲鷺輅興深宮六衣巷導扇五花層
僊馭何其杳神君不可憑還應從此日起觀望昭陵

袁中道 小修公安人郎中

諸陵月下送潘尚寶

野客無名隸奉常朱藤阜帽踏清光石橋印月深深
雪松鬣搖風暗暗香官道馬嘶燈火密長陵鐘動履

聲忙祠臣誰帶煙霞氣白髮鬢鬢尚璽郎

鄭明選 侯升歸安人刑垣

上永陵

肇聖清河水興王自郢都三爲代邸讓一握漢家符
社稷承堯服乾坤定禹謨神功九葉盛大禮百王殊
紫氣真人散丹砂術士誣石扉藏玉虎銀海浴金鳧
二女悲湘水羣臣望鼎湖地環滄海闢山擁薊門紆
王氣真蔥鬱精靈歛有無中官供寢薦七萃護雄圖
願錫皇孫福長聞萬歲呼

朱國祚 兆隆秀水人太傅

西山謁景皇帝陵

辰園悽斷白楊風黃瓦今看天壽同北狩豈無通問
使南城專賞奪門功若教守土盟城下安得蒙塵返
域中多少諫臣司耳目昌言翻賴校官忠

追復景皇帝諡號由

荆門州儒學訓導高瑤上疏言之

謁定陵有感述

乞歸自放潞河船息偃江湖二十年往事句臚成夢
寐重來弓劍莫攀緣要知孝為慈闈盡誰道恩從貴

戚偏猶記南宮封事入聽言終似轉圜然

恭謁慶陵

講幄頻趨鶴籞深重來就日慘棠陰十年始受東朝
冊一月真傾下土心視權盡收中使節披沙罷採非
人金最愁日曆書難既龍去烏號涕不禁

其二

枚卜纔宣三殿麻深宮遽晏五雲車翠微色映長陵
樹金粟堆開景帝窪北去重關遮鳥道西來一水抱
龍沙白雲村下園官近未夏雕盤已薦瓜

郭正域 美命江夏人少宗伯

遣祀景陵

宣皇陵廟天山裏王氣蔥蔥鎖帝梧只見丹臺餘寶
鼎不聞銀海繞金鳧千官露舄朝珠隴五夜雲車下
紫都記得當年巡幸日道傍駐輦問農夫

區大相 用孺高明人中允

朝陵遇雨

言避峻陵雨翻行大壑雲微風清樹氣積澗洗山文
銀海春波闊龍池細澗分九陵松栢路香靄日氤氳

供事長陵

文皇鼎成後此地塋衣冠日月神宮闕山河帝寢安
塞雲疑扈蹕關路想回鑾寂寞犁庭事深知創業難

其二

方劍思軒后山川會禹陵翠旗何日返龍馭幾時升
寢殿行春草幽宮寂夜燈萬年關路北神武至今稱

鄭以偉 子夫上饒人少保

霜降請謁德陵

萬壑哀湍霜葉丹橋山劍舄碧天寒稜恩殿下千行

淚白髮當年舊講官

沈孝徵

公廉海鹽人副使

陪祀長陵

憶昔攀龍向鼎湖幾回清夜聽啼鳥南來風雨羣山
合北望關河落照孤累葉衣冠瞻祖廟中宵絲仗發
清都霜華滿地松楸冷英爽于今陟降無

劉士驥

允良禹城人檢討

長陵陪祀

赤縣歸真主青山鎖故宮玉魚沉永夜石馬立西風

霜露秋容肅椒蘭祀典崇明禋鸞馭在濟濟駿奔同

姚希孟

孟長長洲人少宗伯

謁景皇帝陵

低回往事未堪陳誰抱遺弓泣紫宸遙共祿陵今夜
月可憐邸邸故園春朔方老將黃沙苦西市尚書碧
血新陟降在天應不遠蕭蕭松柏臥麒麟

陸

寶

敬身勤縣人中書

光宗皇帝挽歌

辨色初勤政龍樓御蹕臨禹謨咨益稷殷祚從丁壬

禁雪沾衣白宮池染淚深他年青史上從諫識天心
其二

喪車蘭殿出隧道栢城通七月期方至元年曆未終
仙遊無棄屣臣節有號弓嗣聖鴻猷在河山豈盡空
曹學佺 能始侯官人副使

萬曆皇帝挽歌

薄海聞遺詔旻天號泣多勵精時匪懈法祖算還過
龍去徒留劍鳥傷不渡河前星早有屬臣庶已誦歌
泰昌皇帝挽歌四首

龍馭升遐日封章滿御牀施行猶令旨德意自先皇
沛若江河決俄然石火光更聞哀詔到能不重傍徨
其二

勅進箋三上騰權遍九垓逐臣皆召用中使盡收回
貨出昭先儉心勞集相才大工須計日久矣柏梁災
其三

罷稅不停徵邊庭歲用增金錢溢輸輓士馬飽飛騰
北闕聞天語東隅望日升那堪遽辭世倉卒治山陵
其四

九轉神丹秘三旬帝業終春秋書法謹中外揣摩窮
雨泣將填巷攀髯或墮弓由來戮方士豈但爲無功
顧玘徵 文玉嘉興人文學

過天壽山

驅車昌平道荒寒曠無人斜陽澹衰草颺風吹征輪
迢遙天山路寂寞寢陵闡振衣一瞻拜老淚揮埃塵
古木集歸鴉依依得所欣嗟彼乘軒者當年卷注臣

顧絳 寧人崑山人

天壽山六十韻

成祖昔定都乃省茲山陽羣山自天來勢若蛟龍翔
東趾據盧龍西脊馳太行後尻坐黃花前面臨神京
中有萬年宅名曰康家莊可容百萬人豁然闡明堂
維時將作臣奉旨趨傍傍盛德比霸杜宏規軼瀝却
雷電驅玄冥白雲升帝鄉三光墜榆木窮北回輻輳
駮駮金粟堆寂寞橋山藏右獻左次景裕茂迤西旁
恭陵在茂西稍折南維康永陵在東南規模特恢張
硬石爲玄墀丹青煥雕梁昭近九龍池定依昭左方
其制亦如永工麗踰孝長慶居獻西隅德奠永東岡

環山數十里松柏參天蒼列宗每駕朝百執恆趨蹌
一年祭三舉侍從來班揚詩追安世歌典與郊禘光
天禍降宗國滅我聖哲王渴葬池水南靈宮迫妃殤
上無寶城制周帀唯塼牆下有中涓墳陪葬義所當
殿上列三主妃栗帝后桑

田貴妃主崇禎間所立帝
后主則昌平州民立也

問此何

代禮哽咽不可詳麥飯提一簞棗榛提一筐卮酒與
山蔬一一自攜將下階拜稽首出涕雙浪浪重上諸
陵間裴回復彷徨茂陵樹千株獨立不受戕門闔尚
完具上頭安御牀自康以接慶小樹多榆枋殿樓盡

黃瓦透迤各相望康昭二明樓竝遭劫火亡定陵毀
大殿以及東西廊餘陵半無門累甃仍支棗尚存宰
牲亭暨外諸監房石人十有二袍笏兼戎裝六獸柱
則四制與鍾山亢跨以七孔橋峙以白石坊仁宗所
製碑崱嶸當中央行宮已頽壞御路徒荒涼每陵二
太監猶有稱司香人給地數畝把耒耕山場春秋祭
碑下共用一豕羊皆云牧騎來斫伐尤披猖并力與
之爭僅得保界疆有盜貴妃冢斬首竿以槍於時姦
宄民瞿然始懲創繞陵凡六口六口各有兵一陵立

一衛衛設屯與倉居庸有總兵昌平有侍郎一朝盡
散逆無復陵京防燕山自峩峩沙河自湯湯皇天自
高高后土自芒芒哭帝帝不聞籲天天靡常誰充八
陵使陳辭申此章

肅松錄卷四

詩

長陵

譚吉璉

居庸叠嶂鎖雄關翠色霏微天壽山一渡大江非再
舉三犁朔漠竟無還提封緬邈遼元舊陵寢依稀虎
豹閒不分山僧尋邈邈肯容康老石林間

獻陵

幽宮自是白雲鄉松徑如聞睿藻香一德賢臣尊保
傅十行御札赦齊黃悲風似向銅龍夜澹月猶迷鳩

鵲涼紫極掩芒天祿盡九原應侍有歐陽

景陵

衣冠月出儷清齋何似微行紫陌街洗馬林邊開細柳騶虞頌後棄朱厓當年鑄鼎雲壘重此日遺弓風雨霾遐想宸章招隱賦儒衣百拜九重階

裕陵

雞鳴山驛舊曾過今見塵封方相戈出塞歌寧悲雨雪奪門功豈誓山河已知官樹南城少尚想旌旂西苑多司禮貂璫還廟祀金牌詔獄更如何

茂陵

葱蘢宰樹藹坡坨人誦賢王禁斧柯兩鉞任從西廠握千斤間發楚江叱星移似寶憐溪水月影如弓憶錦鞞數遣黑青驅殿上青燐每引萬妃過

泰陵

岐嶷由來應泰山泰陵陵樹有誰刪受言不付錦衣衛講武常辭嘉峪關廟秩姜嫫應頌魯勅停佛塔自希顏殿前惟見紅鴉繞似說恩深報玉環

康陵

寢園卑隘似皇莊晚駕宮車出豹房漫說將軍巡上
谷尚煩御史下南昌宸遊只愛中常侍禮懺常名大
法王豈是霸陵崇儉德孤松謾謾對青陽

永陵

翠嶺官牆獨再圍祿恩門鎖靄餘暉臺高太乙壇曾
是爐煮丹砂鼎已非烽火甘泉驚入報鰲帆東海悵
頻飛杳恩今夜玲瓏月華表應來丁令威

昭陵

卽看池水猶消竭况復丘陵亦變遷火似驪山畱白
獸樹同梧野迥蒼煙兩都尚憶金甌固三相頻呼玉
几前却怪改元因改邑州名延慶在山前

定陵

獻歲春風嶮峭寒况經陵廟已凋殘寶符遲久東宮
建石柳匆忙西井攢黨論已然分洛蜀夕烽只是報
平安初元善政多傳說幾度徘徊倚玉闌

慶陵

黃山拱木未全凋曲水斜通宛轉橋日出扶桑尋入
海年來諫草自干霄崩天那復關頭觸下地多應爲

尾脩自羨漢文稱有道早時分付建東朝

德陵

鎖山高聳石嶺岼面折龜文哭鳥寒三殿松雲愁入
棟五侯珠璧恨餘棺青蠅獨往虞翻弔大鳥端爲楊
震看金石原非不死藥舉朝寧必訟紅丸

思陵

思陵樹色晚煙迷路近紅門西復西奄侍有心能化
碧椒房無怨白磨笄非關未與頻陽宅只是難封函
谷泥聞說先皇曾灑淚至今宿草尚含悽

辨

賢妃二井辨

譚吉璉

天壽山中妃墓多矣而此二墓獨名井者何釋井者
曰清也通也又曰法也節也又曰井以不變更爲義
皆於墓無取而稱之者是成祖垂戒子孫也旣爲井
矣尚可爲塋域乎後人不察東則德陵穴其傍西則
定陵窳其後帝王者龍德而正中者也山之位乾則
近乎亢隧之臨井則逼乎潛龍也而鮒矣易曰井谷
射鮒能無慨然

又辨

蔣薰

成祖十六妃當是位等儀嬖視同卿輔者非如侍盤
匱執洒掃死而可瘞以宮人斜也曷不墓焉於井何
居或曰宮寵如貫魚井鮒不可貫失帝寵也或曰井
溲不食妃死勿復生惻帝心也二說好異終非見爾
今相地家多以窀穸處名金井高爲墳而下爲井墓
培土曰墳穴坎曰井無足異者亦觀景泰帝乎毀陵
稱墓奚不可乃世傳景泰窪窪與井猶夫墓與

康老墓辨

譚吉璣

當時諸墓盡遷而獨畱康老一墓非有他也王者枯
骨猶埋况取其山而爲兆乎存之者仁也亦義也太
祖之於順帝成祖之於康老爲庶幾矣 本朝遇明
遣祭置田戒樵採守碑誅天道好還有以哉昔樛里
子卒葬渭南章臺之東曰百年後當有天子宫夾我
墓至漢興長樂宮在其東未央在其西武庫正直其
墓秦人智樛里吾於康老亦云

景泰陵辨

蔣薰

按景泰帝臨馭時自建壽陵尋毀之遺墟尚在故邊

尚書貢有過壽陵故阯詩後人不敢稱相傳景泰窪
 虞稽勲淳熙曰貞松心不移偃蓋覆神堂坤維幸勿
 絕一窪得新藏蓋謂此也今諡號雖復陵制不備無
 龍鳳門石几明樓者仍其毀與雖不列諸陵乃景泰
 存社稷功無忝祖宗不可泯沒合以陵名若譚錄次
 於裕陵後業經明毀未蒙清復何可擅入哉

思陵辨

按崇禎帝后因田妃墓合葬為陵制度簡略明樓無
 樓寶城無城易祿恩以饗殿缺龍鳳於靈寢然得神

依祖宗林肅松楸亦厚幸矣昔羅隱之傷隋煬也平
 陳事業只換雷塘數畝田豈如漢代長安陽平同歸
 渭北哉薰於思陵庶幾收泪云

附記

錄筆譚一則

明成祖定鼎北京遂葬燕山其穴乃國師姚廣孝所
 點卽竇五桂之故居也前對一小玉几案姚公云至
 尊無對令挑去之

錄鄭端簡今言六則

廖均卿江西人精地理成祖擇壽陵久不得吉壤永樂七年文皇后徐氏未葬禮部尚書趙珣以均卿至昌

平縣徧閱諸山得縣東黃土山即西山最吉成祖即日

臨視定議封爲天壽山命武義伯王通等董役授均卿官或曰定長陵者王府尹也亡其名亦不知何許人

成祖文皇帝仁孝文皇后徐氏葬長陵仁宗昭皇帝孝誠昭皇后張氏葬獻陵宣宗章皇帝孝恭章皇后孫氏葬景陵英宗睿皇帝孝莊睿皇后錢氏葬裕陵

恭仁康定景皇帝景皇后汪氏葬西山憲宗純皇帝孝貞純皇后王氏葬茂陵孝宗敬皇帝孝康敬皇后張氏葬泰陵武宗毅皇帝孝靜毅皇后夏氏葬康陵英宗側室孝肅皇后周氏憲宗生母也漢文帝詔自稱朕本高皇帝側室之子云憲宗側室孝穆皇后紀氏孝宗生母也孝惠皇后邵氏獻皇帝生母也耐葬二帝陵

成祖十六妃諡葬皆不可考然皆祀於陵仁宗諸妃陪葬惟三妃別葬金山宣宗諸妃陪葬別葬金山者

一妃英宗遺詔皇妃他日宜合葬惠妃亦須遷來以

後諸妃次第祔葬今止睿皇后錢合葬裕陵諸妃竟

無陪葬者憲宗十二妃皆葬金山惟恭肅端順榮靖

皇貴妃葬天壽山永陵世宗諸妃陪葬不由隧道列於

外垣之內寶城之外明樓之前左右相向以次而附

然孝潔皇后陳亦不入永陵諸妃亦如之今惟穆廟

生母杜太后葬永陵

孝陵太祖長陵成祖皆中宮先崩不立繼后獻陵仁宗至康

陵武宗皆后後帝崩裕陵英宗二后孝莊錢茂陵憲三后

孝貞王孝穆紀太后憲孝穆紀太后孝惠

紀孝惠邵蓋孝肅周太后憲孝穆紀太后孝惠

邵太后獻皆母以子貴尊稱之號也成化戊子四年季

皇帝生母錢后英廷臣議葬事云合葬裕陵宜如漢

夏孝莊崩宗后文之於呂氏宋仁之於劉后茂陵憲重違孝肅生周太

母意未允彭文憲公時姚文敏公夔率羣臣伏闕號

哭竟得如請

孝烈皇后世廟繼將葬上念西苑之變孝烈有大功

欲葬於孝潔皇后世廟元之左已而中止上新作壽

陵至是定名永陵令先葬后上曰孝陵長陵先葬孝

慈高廟仁孝文廟也
馬后 徐后

正統初建文君出滇南至廣西一日呼寺僧謂曰我
建文皇帝也寺僧大懼白官府迎至藩堂南面跣足
坐地自稱朱允炆曰胡濙名訪張儼偈爲我也衆聞
之悚然聞於朝乘傳至京師有司皆以王禮見比至
入居大內以壽終葬西山不封不樹

錄滄江逸史二則

永樂二十二年七月十八日上崩於榆木川司禮監
馬雲孟驥等密召楊榮金幼孜入御幄議以大師在

外去京師尚遠秘不發喪亟命工部官括行在及軍
中錫器悉收入內幄召匠銷錫製爲棹棹成權斂而
錮之命光祿進膳如常儀益嚴軍中號令人皆莫測
比龍輦入關寂無知者十二月庚申葬長陵按此則
區大相供事長陵有此地葬衣冠之句失其實矣
天順元年二月朔皇太后誥諭廢景泰帝仍爲郕王
十九日薨葬祭禮如親王諡曰戾妃嬪唐氏等俱賜
紅帛自盡以殉葬成化十年復郕王帝號上尊諡

錄國朝典故一則

明高廟文廟仁廟宣廟皆用人殉葬至英宗臨崩時
召憲宗謂之曰用人殉葬吾不忍也此事宜自我止
後世子孫勿復爲遂遵爲定制

錄靜志居詩話一則

建文四年事蹟革除之後文獻俱不足徵相傳長陵
用王景議葬以天子之禮然鍾山之麓一抔安在祀
典無聞則其說妄也其曰葬之西山旣不封不樹矣
安得又表曰天下大師之塔要其說更妄也自弘治
中禮部主事楊循吉首請追謚建文君隆慶初東莞
布衣譚清海請復革除年號告之高廟而追上建文
君謚萬曆中通政司沈子木國子司業王祖嫡禮部
尚書范謙給事中楊天民御史牛應元先後進言得
旨存其年號崇禎中繼以給事中張國維禮部侍郎
呂維祺給事中沈胤培駙馬都尉鞏永固而褒卹之
典久而未舉迨顧錫疇典禮容臺始定議建文君謚
曰嗣天章道誠懿淵恭覲文揚武克仁篤孝讓皇帝
廟號惠宗馬后曰孝愍溫仁貞哲睿肅烈襄天弼聖
讓皇后

錄竹垞詩話一則

當李自成陷京師思陵將殉社稷傳旨後宮令自裁而宮監王永壽從懿安皇后宮至白帝曰懿安皇后業自縊矣帝連稱好好乃走煤山經于海棠花下福藩遙上懿安皇后諡曰孝哀慈靖恭惠溫貞偕天協聖哲皇后詔云旣慷慨以捐軀亦從容以就義而順治實錄於甲申五月大書葬明崇禎帝后及天啓皇后張氏於昌平州陵國史存據可以無疑其後有魏忠賢養女任氏進之德陵立爲貴妃寇亂後流轉民間詐稱天啓皇后送於官光祿寺月有廩給遂疑后失節沉寃莫雪故附白之。

序

原序

康熙戊午冬歲將除矣至昌平與楊子謙六詢山川勝蹟出州志一編相示春正元日靜坐僧寮惟聞錚鐸梵唄聲回視京華塵鞅不啻萬山深處也及讀

世祖皇帝祭明陵諸

宸翰每於思陵三致意焉夫三

代盛時虞賓在位白馬萋苴而已若穀林蒼梧之間

屬車臨幸與悲抔土者則未之聞乃

世祖皇帝時巡所及躬執椒漿灑淚爲文并置陵監繕
宮垣禁樵牧忠厚惻怛可謂至矣百世而下讀斯文
也猶當興起矧聰生明季逮見聞者與因襍被入山
謁陵摩碑欲泣而歌更采父老所述與州志所載哀
爲一集名肅松錄蓋遵

聖詔以附揚休之義云爾

康熙十八年己未春日譚吉璉序

後序

薰風崇禎九年舉孝廉兩上公車而明運衰亂居就
李之長水逮順治辛卯始奉檄入都先後遊燕者數
矣初無泉石之好繼有墟墓之哀以故天壽山未嘗
一至也今年七十有一得讀登州守譚君肅松錄嗚
然於懷宗死社稷

世祖修陵寢亡非人咎澤自天施不獨覆露故君自長
陵以下咸肅松楸卽穀林蒼梧曷可望哉雖然自古
以來石槨待衛佳城居勝此未葬而不馮其子者至
於發丘摸金見毀於即將校尉未聞禍及園陵而幽

室得全者幾耶縱如漢守秦冢陳鑒梁暴未有才

皇清優禮前明旣禁護之旋修飭之旣祭享之復憫惜
之甚而死忠王監賜塋一區俾附陵外與管仲墳接
齊桓衛青塚陪漢武又何異焉嗚呼薰竊有慨者宋
明兩代其家法國政忠厚相同乃南渡諸陵焚皆棄
骨盡發於楊璉真珈食報奚若此天壽松楸非如唐
珽冬青可同憑弔矣

康熙十九年庚申夏六月蔣薰序



